



## ҚАЗАҚСТАН-ГЕРМАНИЯ: ИНВЕСТИЦИЯ РЕКОРДТЫҚ ДЕҢГЕЙГЕ ЖЕТТІ

Мемлекет басшысы Қасым-Жомарт Тоқаев Германия экономикасы Шығыс комитетінің басқарма төрағасы Катрина Клаас-Мюльхойзерді қабылдады.

Кездесу барысында Президент Қасым-Жомарт Тоқаев пен Германия экономикасы Шығыс комитетінің басқарма төрағасы және CLAAS Group компаниясы байқаушылар кеңесінің төрағасы Катрина Клаас-Мюльхойзер екіжақты экономикалық ынтымақтастықты одан әрі нығайту перспективасын талқылады.

Мемлекет басшысының айтуынша, Германия Қазақстанның Еуропа Одағындағы стратегиялық серіктесі саналады. Сауда-экономикалық ка-

тынастар қарқынды дамып келеді. Сондай-ақ неміс бизнесі Қазақстандағы үлесін кеңейтуге қызығушылық танытып отыр.

Президент былтыр Қазақстанға Германиядан тартылған тікелей инвестиция көлемі 64 пайызға өсіп, 770 миллион долларға жеткенін атап өтті. Бұл — рекордтық көрсеткіш.

Кездесуде ауыл шаруашылығы саласындағы ынтымақтастық мәселесіне де ерекше назар аударылды. Осы орайда Қасым-Жомарт Тоқаев

бұған дейін Орнықты егіншіліктің аймақтық орталығын құру жөнінде ұсыныс айтқанын еске салды. Президенттің пікірінше, бұл орталық еліміздің ауыл шаруашылығы әлеуетін барынша толық пайдалануға, инновациялық технологияларды енгізуге және оларды коммерцияландыруға ықпал етеді.

Бұдан бөлек, Мемлекет басшысы Қазақстанның аграрлық әлеуетін дамытуға CLAAS зауытының қосқан үлесін жоғары бағалады.

## ТЕРРОРЛЫҚ ӘРЕКЕТТІ ҚАТАҢ АЙЫПТАЙДЫ

Президент Қасым-Жомарт Тоқаев Словакия Премьер-министрі Роберт Фицоға қастандық жасалуына байланысты бұл террорлық әрекетті қатаң айыптайтынын және мұндай қараулықты мүлде ақтауға болмайтынын мәлімдеді.

Қазақстан мен Словакияны ұзақ жылғы достық пен өзара тиімді ынтымақтастық қатынастар байланыстырады. Бұл игілікті істе Премьер-министр Роберт Фицо елеулі рөл атқарды.

Мемлекет басшысы Қасым-Жомарт Тоқаев Роберт Фицоның тезірек сауығып кетуіне тілектестік білдірді.

## МЕМЛЕКЕТТІК САТЫП АЛУ ОҢТАЙЛЫ ТЕТІККЕ АЙНАЛМАҚ

Кеше Мәжілістің Жалпы отырысында депутаттар «Мемлекеттік сатып алу туралы» және оған ілеспе заң жобаларын, сондай-ақ «Жол жүрісі туралы» заңға және Әкімшілік құқық бұзушылық туралы кодекске көлік құралдарының жекелеген түрлерінің жүруін ұйымдастыру мен жол қауіпсіздігін цифрландыру мәселелері бойынша заңнамалық түзетулерді екінші оқылымда қабылдады.



«Мемлекеттік сатып алу туралы» заңның жаңа редакциясы бойынша жұмыс тобының жетекшісі, Мәжіліс депутаты Руслан Қожасбаев баяндама жасады. Мемлекет басшысының тапсырмаларын орындау мақсатымен депутаттар заңда атқарушы органмен бірлесіп, отандық жеткізушілерді қолдау және көрсетілетін қызметтердің сапасын арттыру шарттарын белгіледі. Өзгерістердің бірі — нысанды салу және пайдалануға беру бойынша кешенді жұмыстарды қамтитын — ЕРС келісімшарттарын енгізу. Сондай-ақ бір көзден алу тәсілімен мемлекеттік сатып алуды жүзеге асырудың негізі ретінде отандық тауар өндірушілермен жасалған офтейк-келісімшарттарын анықтау ұсынылады.

«Екінші оқылымға дайындық барысында мемлекеттік сатып алу бойынша шағымдану рәсімдері, өнім берушілердің жауапкершілігі, сондай-ақ бір көзден сатып алу тәсіліне қатысты қағидалар нақтыланды. Мемлекеттік сатып алу рәсімдерін жеңілдету мақсатымен шағымды ұйымдастырушы қарайды. Оның шешіміне әкімшілік іс жүргізу аясында шағым түсіру мемлекеттік сатып алу рәсімдерін тоқтатпайды», — деді Руслан Қожасбаев.

(Жалғасы 3-бетте)

## ЖАМБЫЛДА ЖАРҚЫН ЖОБА ЖАЛҒАСЫН ТАПТЫ



Осыдан екі жыл бұрын Жамбыл облысында «Әулиеата жастары» өңірлік тұрғын үй бағдарламасы іске қосылған болатын. Жаңа жоба жастарды баспанамен қамтуға бағытталды. Бастапқыда бағдарламаның болашағына күмәнмен қарағандар көп болса, бүгінде жоба өз өміршендігін дәлелдеп отыр. Алайда биыл бағдарламаға қаржы қаралмайтыны айтылып, жастардың үміті үзілгендей болған. Бірақ күні кеше ақжолтай хабар жетіп, жобаның бойына қайта қан жүгірді. Биыл үміткерлерді қандай өзгерістер мен талаптар күтіп тұр. Зер салып, зерделеп көрсек...

## ДОМБЫРА ДЕГЕНДЕ ҚАЗАҚ ЕСКЕ ТҮСУІ КЕРЕК



Алматылық Айбек Серікұлы — шетелдік хит әндердің мақамын домбыра нотасына түсіріп, өзге халықтың таңданысын тудырып жүрген нағыз талант иесі. ТикТок желісінде MUZBANDa никнеймімен ашылған парақшада көбіне Еуропа, ТМД елдеріне тән әндерге түсірілген тунорлар жарияланады.

## СУ САЛАСЫНДА КАДР ТАПШЫ МА, ҚАДІР ТАПШЫ МА?

Былыр еліміздің бірқатар өңірінде қуаңшылық болып, Жамбыл облысының алты ауданында төтенше жағдай жарияланса, биыл еліміздің батыс және солтүстік өңірлерін қарғын су алды. Он облысқа топан су жайылды. Елімізде су тасқыны қауіпі әлі де сақталып отыр. Тасқыннан бүлінген үйлердің шығыны келесі аптада белгілі болмақ. Қазіргі ақпаратқа сәйкес, елімізде 13 мыңға жуық үйді су басқан. Ал Ақтөбе облысында 2 елді мекен әлі көлік қатынасынсыз отыр. Үш өңірде індеттен қырылған мал көмілген 10 жерді су басқан болатын. Қазір тиісті қызметтер жергілікті жерлерде жедел дезинфекциялық іс-шараларды жүргізіп жатыр. Президент су тасқыны салдарынан қалыптасқан ауыр жағдайға байланысты Үндеуінде: «Біз алапат су тасқынынан тиісті қорытынды шығаруымыз керек. Апаттардың алдын алу жұмысындағы кемшіліктен бастап, су шаруашылығы мамандарының тапшы болуы, табиғатқа немқұрайды қарауға дейін көп мәселені реттеу қажет», — деді. Мемлекет басшысы атап өткен су шаруашылығы мамандарының тапшылығы бүгінде өзектілігін көрсетті.



Былырғы қыркүйекте ғана құрылған Су ресурстары және ирригация министрлігіне үлкен жүк артылып отыр. Министрлік жасақтала салысымен Қазақстанда 2023–2029 жылдарға арналған су ресурстарын басқару жүйесін дамыту тұжырымдамасын әзірлеуге кірісіп кетті. Ол жерде де білікті мамандардың тапшы екені айтылған. Құжатта су шаруашылығы бойынша жылына бар болғаны 200 маман жоғары оқу орнын бітіретіні, 100 түлек орта техникалық білім алып шығатыны, сонда түлектердің 22 пайызы ғана мамандығы бойынша жұмысқа орналасатыны көрсетілген. Бұған да сарапшылар көптеген жоғары оқу орнында оқыту

тек «су ресурстары және суды пайдалану» бойынша жүргізілетінін, бірақ мұндай маңызды салаға «гидромелиорация», «өзен құрылыстары мен су электр стансаларының гидротехникалық құрылысы», «суару жұмыстарын механикаландыру», «су шаруашылығындағы экономика», «гидрогеология және инженерлік геология», «сумен жабдықтау және су бұру» және «жердегі гидрология» сияқты мамандар қажеттігі көтерілген екен.

### КЕҢЕС ЗАМАНЫНАН ДА КЕРІ КЕТТІК ПЕ?

Тұжырымдамада су шаруашылығы саласын бітірген инженерлердің дайындығы 1990

жылдардағы мамандарға қарағанда әлсіз екені айтылған. Көптеген жоғары оқу орнында оқыту тек «су ресурстары және суды пайдалану» бойынша жүргізіледі. Кеңес дәуірінде гидрология мамандығына небәрі 25 адам қабылданса, арасынан 12-15 адам бітіріп шыққанын, бұл ел игілігіне жеткілікті болғанын және барлық түлек жұмысқа орналасқанын айтады. Олар көбіне «Қазгидромет» гидрометеорологиялық қызметінде немесе «Қазгипроводхоз» ғылыми институтында жұмыс істеген.

(Жалғасы 5-бетте)





## ӨНЕРДЕ ШЕКАРА ЖОҚ

Елордадағы «Жастар» театрында SENSITIVE өнер ұжымы Александр Гриннің әйгілі «Алые паруса» повесінің желісі бойынша әзірленген «Рассекая волны» атты пластикалық перформансты көпшіліктің назарына ұсынды. Есту қабілеттері төмен өнерпаздар сахналаған қойылым көрермендерді ертегілер әлеміне жетелеп, өмірдің философиялық мәніне терең үңілуді және адамдар арасындағы қарым-қатынасқа жаңаша көзқараспен қарауды үндейді.

Спектакльге Сенат Төрағасы Мәулен Әшімбаев бастаған бір топ сенатор арнайы барды. Палата Спикері театр әртістерінің шеберлігін жоғары бағалап, мүмкіндігі шектеулі азаматтарды ортаға бейімдеуде және оларды оналтуда өнердің атқаратын рөлі зор екенін айтты. Сондай-ақ ол елімізде аталған санаттағы адамдарды қолдауға ең жоғары деңгейде баса мән беріліп, бұл бағытта кешенді және жүйелі жұмыс жүргізіліп жатқанын тілге тиек етті.

Сонымен қатар Сенат Спикері өздерінің қайыр-қайратымен барша көрерменді жігерлендіріп

жүрген SENSITIVE би ансамблінің ұжымына және жобаның көркемдік жетекшісі, талантты жастардың дарынын шыңдап, оларды жаңа жетістіктерге жетелеп келе жатқан Ольга Ростовщиковаға алғыс білдірді.

Айта кетейік, SENSITIVE театры осыдан 18 жыл бұрын Петропавл қаласындағы есту қабілеті төмен балаларға арналған мектеп-интернаттың базасында құрылған. Қазір елімізбен бірге бір-қатар шет мемлекетте де аты мәлім бұл өнер ұжымы көптеген халықаралық байқау мен фестиваль-дың лауреаты.

## ӘЙЕЛДЕРДІҢ ЭКОНОМИКАЛЫҚ МӘРТЕБЕСІН КӨТЕРУ МАҢЫЗДЫ

Парламент Сенаты Төрағасының орынбасары Ольга Перепечина «Әйелдердің экономикалық, әлеуметтік және саяси құқықтары мен мүмкіндіктерін кеңейту мәселелеріндегі өңірлік тәсіл» атты әйелдердің Азия форумына қатысты.



Шараға қатысушылар Бейжін іс-қимыл тұғырнамасын іске асыру, сондай-ақ әйелдердің қазіргі жаһандық экономика жағдайындағы экономикалық құқықтары мен мүмкіндіктерін кеңейту мәселелерін талқылады.

Сенат Төрағасының орынбасары Ольга Перепечина форумда сөйлеген сөзінде еліміздің Президенті Қасым-Жомарт Тоқаев жүргізіп отырған мемлекеттік саясаттағы негізгі басымдықтардың бірі — гендерлік теңдік, әйелдердің қоғамдық-саяси және экономикалық өмірге қатысу деңгейін арттыру екенін атап өтті.

«Әйелдердің экономикалық мүмкіндіктерін кеңейту кез келген мемлекеттің дамуындағы негізгі мәселе және орнықты болашақ қалыптастырудың кілті болып табылады. Тұрақты экономикалық өсуді жеделдету және қоғамдық әлауқатты барлық деңгейде жақсарту үшін әйелдердің экономикалық мәртебесін көтеру аса маңызды. Сондықтан Қазақстан әйелдер кәсіпкерлігін қолдауды күшейтуде белсенді жұмыс жүргізіп келеді. Қазақстандағы жұмыс істеп тұрған шағын және орта бизнес субъектілерінің 47%-ын әйелдер басқарады. Олардың әлеуетін сапалы тұрғыда күшейту үшін Азия Даму банкімен және БҰҰ Даму бағдарламасымен ынтымақтаса отырып, еліміздің барлық өңірлерінде әйелдер кәсіпкерлігін дамыту

орталықтары іске қосылды», — деді Ольга Перепечина.

Сенат Төрағасының орынбасары сонымен қатар Пекин тұғырнамасы үкіметтердің, халықаралық ұйымдардың және азаматтық қоғамның күш-жігерін жұмылдыру арқылы жыныстық кемсітудің барлық түрін жоюға бағытталған қуатты тетікке айналғанын атап өтті. Күш-жігерді біріктіру мен елдер арасындағы әрекеттерді үйлестіру гендерлік теңдік бағдарламасын одан әрі ілгерілетуге елеулі түрде және ұзақ мерзімге оң ықпал ете алады.

Сенат Төрағасының орынбасары Өзбекстан Олий Мәжілісі Сенатының Төрағасы Танзила Нарбаевамен де кездесті. Тараптар парламентаралық ынтымақтастықты дамыту, өнеркәсіп кооперациясы, көлік байланысы саласындағы байланыстарды нығайту, инфрақұрылымдық және сауда кедергілерін жою мәселелерін талқылады.

Ольга Перепечина сондай-ақ Қатар Шура Кенесі Төрағасының орынбасары Хамда бинт Хасан Аль Сулайтимен кездесті. Кездесуге қатысушылар екі елдің парламенттері арасындағы өзара іс-қимылдың келешегін, сондай-ақ әйелдер мен балаларға қатысты зорлық-зомбылықтың барлық түрлерін жоюдағы өңірлік мәселелерді талқылады.

## ЖЫЛУ МАУСЫМЫ: ДАЙЫНДЫҚ ЖАҚСЫ, НӘТИЖЕ ҚАНДАЙ?



Еліміздің орталығы мен солтүстігі және шығыс өңірлері 15 қыркүйекке дейін жылу маусымына сақадай сай болуы тиіс. Ал қалған облыстарға берілген соңғы мерзім — 15 қазан. 10 мамырда өткен Үкімет отырысында Премьер-Министр Олжас Бектенов осылай деп шегелеп тапсырды.

Бауыржан БАЗАР

«Қыс шанаңды жаз сайла» дейді халқымыз. Ел Үкіметі қысқа әзірлікті жазға жеткізбей бастап кетті. Өйткені республикадағы жылыту жүйелерінің жағдайы мәз емес. Жыл өткен сайын ескіре түскен жылу көздерінде технологиялық ақау жиілеп, қыс ішінде тұрғындарды әбігерге салатын болған. Осыған байланысты Үкімет басшысы министрлер кабинетінің алдына бірқатар міндет қойды.

«Үкіметтің кеңейтілген отырысында Мемлекет басшысы алдымен апатты жағдайда тұрған 19 жылу орталығын жаңғырту жұмыстарын аяқтауды тапсырды. Энергетика министрлігі әр объект бойынша маған апта сайын баяндап отыруға тиіс. Бекітілген мерзімдерді өзгертуге болмайды. Қыс бойы жөндеу жұмыстарын жүргізуге мәжбүр болған Кентау мен Степногорскідегі және МАЭК пен «Топар» ГРЭС-індегі сияқты күрделі жағдайға жеткізбеу қажет. Жаз айларында күшейтілген режимде жұмыс істеу керек. Егер жұмыстар мерзімінде аяқталмай, сапасы төмендеп кететін болса, онда меншік иелерімен қатар, әкімдіктерге қатысты да шаралар қабылданатын болады», — деп ескертті О.Бектенов.

Премьер мысалға келтірген төрт нысандағы жұмыс расымен де созбаққа салынған. Мысалға, Актаудағы МАЭК-ның №2 энергетикалық блогындағы жөндеу жұмысы қантарда аяқталуы тиіс болған, мерзімі мамырға ысырылды.

«Топар» ГРЭС-індегі қазандыққа да күрделі жөндеу 2023 жылдың 31 желтоқсанда бітуі тиіс еді, маусымға қалып отыр. Кентаудағы №8,11 қазандықтар да былтырғы қарашада аяқталуы керек болған. Степногорск қаласының қазандық агрегатының ағымдық жөндеу жұмысы да келесі айға қалған.

Осы кемшіліктерді қатаң түрде ескерткен Үкімет басшысы отырыста Өнеркәсіп, Энергетика министрліктері мен өңір әкімдіктеріне барлық жылу көздерін отынмен уақытылы қамтамасыз етуді тапсырды. Қазірден бастап коммуналдық-тұрмыстық көмір қорын жинақтап алу керек.

Еске сала кетейік, былтыр желтоқсан айының басындағы қатты аязда Екібастұз, Балқаш, Степногорск, Актау, Теміртау, Көкшетау, Риддер қалаларында коммуналдық шаруашылық қызметтеріне ақау шығып, жылу, су құбырлары кезегімен жарылған-ды. Қақаған аязда тұрғындарды жылу-сыз қалдырған оқиғадан кейін сол кездегі Үкімет Энергетика вице-министрі Жандос Нұрмағамбетовті қызметінен босатқан. Алайда орынбасар орнынан кеткенімен, жылу жүйесіндегі проблема өз күшінде қалды. Бүгінгі күні Қазақстанда 37 ЖЭО жұмыс істеп тұрғанымен, оның 19-ы апатты жағдайда.

Дегенмен жылу көздерін сапалы әрі уақытылы жөндеу үшін Үкімет тарапынан қажетті қолдау көрсетіліп жатыр. Премьер-Министр Кентау, Риддер және Қызылорда қалаларындағы жылу көздерін жаңғыртуға резервтен 16 млрд теңге бөлу

туралы қаулыға қол қойды. Сондай-ақ Көкшетаудағы жылу қазандықтарын жөндеуге 816 млн теңге бөлінді. Қалған өтінімдер бойынша жұмыс жақын арада аяқталмақ. Ендігі міндет — жергілікті жерлердегі жұмысқа күшейтілген бақылау жасау. «Жөндеу жұмыстарында қауіптер бар. Жергілікті жерлерде барлық әкімдердің жұмысын көріп отырмыз. Әкімдер, сіздерге айтарым: жылыту маусымы бойынша штаб жұмыстарына атүсті қарауды доғарыңыздар. Объектілерге өздеріңіз шығып, жөндеу жұмыстарының барысын тікелей бақылауға алу керек. Мен өңірлерге сапарым кезінде Президент тапсырмаларының орындалуын тікелей өзін тексеретін боламын», — деген Олжас Бектенов бұл жұмысқа бақылау жүргізуді тікелей өзі қадағалайтынын байқатты.

Шынында да, биылғы қыс Бектенов басқаратын министрлер кабинеті үшін кезекті сынаққа айналғалы тұр. Жылу маусымына дайындықты арнайы Үкімет отырысында пысықтап алған Олжас Абайұлы, тексерісті бастап кетті. 15 мамырда Ақмола облысына жұмыс сапары барысында Көкшетау қаласының №2 аудандық қазандығына арнайы барып жай-күйін танысты.

Бүгінде қаладағы жылу желілерінің тозу деңгейі 43%-ды құрайды. Биылғы жоспарланған жөндеу жұмыстары жыл соңына дейін көрсеткішті 41%-ға дейін төмендетуі тиіс. Облыс орталығын жылумен қамтамасыз етіп отырған 4 қазандық-тың екеуін (№1, №2) жөндеуге резервтен 816 млн теңге бөлінді. Одан бөлек, қаланың жылу және электр энергиясына деген қажеттіліктерін қамтамасыз ететін ЖЭО салу жобасы пысықталып жатыр. Оның жылу қуаты сағатына 520 Гкал, электр қуаты 240 МВт-ты құрайтын болады.

Үкімет отырысында Энергетика министрі Алмасадм Сәтқалиевтің, Өнеркәсіп және құрылыс министрі Канат Шарлапаевтың, сондай-ақ инфрақұрылымның тозу деңгейі жоғары бірқатар облыстың әкімдерінің баяндамалары тыңдалды. Ресми дерекке сәйкес, еліміздегі жалпы ұзындығы 13 мың шақырым жылумен жабдықтау желілерінің орташа тозуы — 53%, шамамен 7 мың шақырымын ауыстыру қажет. Әсіресе, Павлодар, Ақмола, Солтүстік Қазақстан, Қостанай, Маңғыстау және Қарағанды облыстарында жылу желілерінің тозу көрсеткіші жоғары. Үкіметтің алдында 2030 жылға қарай тозған жылу желілерін 43%-ға дейін төмендету міндеті тұр. Биыл жылумен жабдықтау желілерінің 221 шақырымын жөндеу жоспарланып отыр.

Осы мәселелерді ескере келе, Үкімет энергетикалық сектордың инвестициялық тартымдылығын арттыру үшін қосымша өзгертулер енгізген «Тарифті инвестицияға айырбастау» бағдарламасы шеңберінде биылдың өзінде қолданыстағы стансаларды жөндеу мен жаңғыртуға шамамен 327 млрд теңге тарту жоспарланып отыр. «Қаржы бірінші кезекте әбден тозығы жеткен объектілер мен желілерді жөндеуге жұмсалуда тиіс. Энергетика, Өнеркәсіп министрліктері мен әкімдіктерге қуат көздеріндегі, жылу және электр желілеріндегі жағдайға мұқият талдау жүргізіп, қосымша жөндеу жұмыстарының көлемін айқындауды тапсырамын. Бұл ретте республикалық, жергілікті бюджеттерден және инвестициялық бағдарламалар аясында қаржыландырудың тепе-теңдігін қамтамасыз ету қажет», — деп тапсырма берді О.Бектенов.

Жалпы, биыл бекітілген кестеге сәйкес, электр стансаларында 10 энергоблоқты, 55 қазандықты және 45 турбинаны жөндеу жоспарланған. Қазіргі сәтте 2 энергоблоқта, 12 қазандықта және 2 турбинада жөндеу жұмыстары жүргізіліп жатыр.

## ОРТАША ЖАЛАҚЫ МӨЛШЕРІ АНЫҚТАЛДЫ

Биылғы I тоқсандағы жағдай бойынша елімізде айлық жалақының орташа мөлшері 382 279 теңге болды.

Ұлттық статистика бюросының мәліметінше, 2023 жылдың тиісті тоқсанына қарағанда көрсеткіш өскен. Нақтырақ айтқанда, атаулы мәнде — 12,3 пайызға, нақты мәнде 2,7 пайызға артқан.

Осылайша, жалақының медианалық мәні (жалақы қатарының орталық деңгейі) бағалау бойынша 251 997 теңгені құрады.

Өңірлік бөліністе 2023 жылдың тиісті тоқсанымен салыстырғанда 2024 жылдың I тоқсанында орташа айлық атаулы жалақының ең көп өсуі Батыс Қазақстан облысында — 18,2%-ға, Алматы қаласында — 16,4%-ға, Ақтөбе облысында — 16,1%-ға, Павлодар облысында 15,9% байқалды.

Жалақының орташа мөлшері бір қызметкер жалақысының қосымша ақыларының, үстеме ақыларының, сыйақыларының, салықтарының және зейнетақы аударымдарының барлық түрлерін ескере отырып көрсетіледі. Ол жалақы қорының сомасын кәсіпорындардағы қызметкерлердің нақты санына бөлу арқылы есептеледі.









## БАҒДАР

# ПРОБЛЕМАЛЫҚ НЫСАНДАР – БАҚЫЛАУ БЕКЕТТЕРІНІҢ НАЗАРЫНДА

Былтыр Қарағанды облысында 422 мың шаршы метр тұрғын үй салынды, 55 мыңнан астам жұмыс орны құрылды, 700 шақырымнан астам жол жөнделді. Партияның Қарағанды облысындағы сайлауалды уәделерінің жүзеге асырылу барысы «AMANAT»-тың Партиялық бақылау комитетінің көшпелі отырысында талқыланды.



Қарағанды облысының әкімі Ермәнбет Бөлекпаевтың айтуынша, партияның «Халықпен бірге!» сайлауалды бағдарламасын жүзеге асыру аясында былтыр өңірдегі ауылдық жерлерде жаңадан 2 777 шағын және орта кәсіпкерлік субъектісі құрылып, 985 грант пен шағын несие берілді.

«Быыл 1,7 мың ШОБ жобасын қаржыландыру, 49 мыңнан астам жұмыс орнын құру, жұмыс істеп тұрған ШОБ кәсіпорындарының санын 95,2 мыңға дейін ұлғайту, жұмыспен қамтылған адамдар санын 222,7 мың адамға дейін жеткізу міндеті қойылды. Мектепке дейінгі білім беру саласында 7 ұйым ашу және жұмыс істеп тұрған жеке ұйымдарды 1 379 орынға дейін кеңейту есебінен балаларды қамту көрсеткіші ұлғайтылды. Сонымен қатар «Жер аманыты» жобасы аясында өңірде 540 мың гектардан астам жер мемлекет меншігіне қайтарылды», — делі ол.

Сонымен қатар партиялықтар бірқатар проблемалық мәселені талқылады. Мәселен, Қарқаралы ауданының Талды ауылында және Бұқар жырау ауданының Атамекен ауылында мектеп құрылысы аяқталмай жатыр. Екі білім беру мекемесі де былтыр ашылуы тиіс еді. Мәжіліс депутаты, «AMANAT» партиясы фракциясының мүшесі Құдайберген Бексұлтановтың айтуынша, бұған мердігерлердің жауапсыздығы себеп болып отыр.

Проблемалық нысандарда партиялық бақылау бекеттері (ПББ) жұмыс істейді. Олардың көмегімен құрылыс сапасын, бөлінген қаражаттың тиімді игерілуін және жұмыстың уақытылы жүргізілуін қадағалауға болады. «AMANAT» партиясы Қарағанды облыстық филиалының тө-

рағасы Бекзат Алтынбековтың айтуынша, өңірде 44 ПББ жұмыс істеп тұр.

Былтыр аталған бекеттер жүйелі жұмыс істеп, соның нәтижесінде Приозерск қаласында кәріз-тазарту құрылысы жаңартылды, Абай қаласында жалға берілетін 80 пәтерлі тұрғын үй құрылысы аяқталды, Севан ауылында логистикалық орталық ашылды, Теміртау қаласында Жастар үйі жөнделді және тағы басқа жұмыстар атқарылды.

Партиялық бақылау комитетінің төрағасы, Мәжіліс депутаты Павел Казанцевтің айтуынша, партиялық бақылау бекеттері құрылысшылар мен мемлекеттік органдардың жұмысын қадағалап қана қоймай, қажет болған жағдайда тұтқиілді мәселелердің түйінін тарқатуға және процесті жеделдетуге тиіс.

«Кез келген әлеуметтік нысан, мейлі олаурухана, мектеп немесе Мәдениет үйі болсын, партияның жігі бақылауында. Себебі аталған нысандар тұрғындар үшін аса маңызды. Қоғамдағы жағдайға бейжай қарай алмайтын барша азаматты ПББ жұмысына атсалысуға шақырамыз. Нысанда қандай да бір олқылық барын байқап қалған адам бірден видеоға түсіріп, партияға жолдай алады», — делі ол.

Павел Казанцев партияның сайлауалды уәделерін жүзеге асырып жатқан мәслихат депутаттарының дербес жауапкершілігі мәселесіне жеке тоқталды. Яғни, сайлауалды бағдарламаның тармақтары бұған дейін әру халық қалаулысына жеке-жеке бекітілген еді. Тиісінше, депутат олардың орындалуына дербес жауапты болады.

«Облыстық мәслихат депутаттары — партия фракциясының мүшелері сайлауалды бағдарлама аясында салынып

жатқан нысандарға барынша жиі рейд жүргізіп, депутаттық сауалдар жолдап, мемлекеттік органдармен және мердігер ұйымдармен тығыз жұмыс істеуге тиіс. Бұл қадам партияның сайлауалды бағдарламасын уақытылы орындауға мүмкіндік береді. Депутаттардың міндеті — белсенділік танытпай жатқан мемлекеттік органдарға қозғау салу», — деді ПБК төрағасы.

Өз кезегінде, комитет мүшесі Арман Евниев сайлауалды бағдарламаның орындалу барысын қадағалаудың дәстүрлі әдісінен бөлек, заманауи құралдарды да іске қосу маңызды екенін айтты, жобалық басқарудың ақпараттық жүйесін қолдануды ұсынды. Бұл қадам проблемалық нысандарды 24/7 режимінде бақылауға мүмкіндік береді.

«Сонымен қатар өңір әкімдігімен бірлесіп, партияның сайлауалды бағдарламасын жүзеге асыру бойынша тұрақты жұмыс істейтін жедел штаб құру қажет деген ойдамын. Штаб отырысы аптасына бір рет өтуі керек. Мектеп, емхана салу, ауыл шаруашылығын дамыту болсын, әр бағыттың барлық қатысушыны қамтитын күнтізбелік желілік кестесі болуға тиіс», — делі ол.

Бұған қоса, комитет мүшелері сайлауалды бағдарламаның жекелеген тармақтарының орындалмағаны және дұрыс бақылау жүргізілмегені үшін кейбір лауазымды тұлғаларды «сөгіс» түрінде партиялық жауапкершілікке тарту туралы қаулы етті. Олар арасында Осакаров ауданының әкімі Руслан Нұрмұханбетов, Қарқаралы ауданының әкімі Әділжан Арғынов, Бұқар жырау ауданының әкімі Аблай Сұлтанғали, Абай ауданының әкімі Сәбит Оспанов, «Қарағанды облысының құрылыс, сәулет және қала құрылысы басқармасы» ММ басқарма басшысы Мұрат Мағзин, «Қарқаралы ауданының құрылыс, сәулет және қала құрылысы бөлімі» ММ бөлім басшысы Талғат Омаров, «Бұқар жырау ауданы құрылыс бөлімі» ММ бөлім басшысы Болат Аринов, «Абай ауданының құрылыс бөлімі» ММ бөлім басшысы Бахтияр Мурсалов бар.

Сондай-ақ Қарағанды облыстық Партиялық бақылау комиссиясына партияның сайлауалды бағдарламасын жүзеге асыру бойынша Жол картасының пункттеріне жауапты облыстық және аудандық мәслихаттар депутаттарының партиялық жауапкершілігі мәселесін қарау тапсырылды.

Айта кетейік, Партиялық бақылау комитетінің осындай көшпелі отырыстары барлық өңірде өткізіледі.

Бердібек ҚАБАЙ



рекультивациялау саласында бірлескен ғылыми жобаларды әзірлеу сынды бірқатар мәселені талқылады.

Ғалымдар жана филиалдың ашылуы су шаруашылығына қажетті бөсекке кабелетті мамандар даярлауды күшейту арқылы Өзбекстан мен Қазақстанның су ресурстарын ұтымды пайдалану, АӨК саласында инновациялық технологияларды әзірлеу, цифрлық экономикаға көшу жағдайында ауыл шаруашылығын жана «цифрлық» деңгейге көтеруді жеделдету, Орталық Азиядағы су қауіпсіздігін нығайту салаларына тың серпін береді деп баға беріп отыр.

Қазір өзара жасалған келісімшарт бойынша университеттің «Су, жер және орман ресурстары» факультетінің 1-курс студенттері Ташкентте «Ирригация және гидротехникалық құрылыстар» факультетінде білімін жалғастыруды бастап кетті.

Б.ҚАБАЙ

# ҰРПАҚТАР САБАҚТАСТЫҒЫ СӨЗ БОЛДЫ



Мемлекет басшысы Қасым-Жомарт Тоқаев Ұлттық құрылтайдың үшінші отырысында ұлттың жаңа келбетін айқындайтын негізгі құндылықтарды да тізіп шыққан еді. Ол — тәуелсіздік және отаншылдық, бірлік және ынтымақ, әділдік және жауапкершілік, заң және тәртіп, еңбекқорлық және кәсіби біліктілік, жасампаздық және жаңашылдық болатын. Осы қосарланған алты құндылық ұлттың жаңа сапасын қалыптастырудың негізгі бағыт-бағдары бола алады. Бұл, тіпті идеологиялық тұжырымдама іспеттес. Былтырғы құрылтайда жарияланған «Адал азамат» ұғымымен де үндесіп жатыр. Осы ретте Астана қаласы әкімдігінің Белсенді ұзақ өмір сүру орталығы ұйымдастыруымен «Адал азамат — Адал Еңбек — Адал табыс» тақырыбында дөңгелек үстел өтті. Аталған іс-шара Ұлттық құрылтайдың III отырысында Мемлекет басшысы берген тапсырмаларды іске асыру мақсатында өткізілді.

Наурызбек САРПА

Ұрпақтар сабақтастығы тақырыбында өткен дөңгелек үстелде алғашқы болып сөз сөйлеген Астана қаласы әкімдігінің «Белсенді ұзақ өмір сүру орталығы» КММ директоры Мұхтар Еркетаев орталықтың жұмысы туралы айта келе, орталықтың ұрпақ тәрбиесіне де баса назар аударып отырғанына тоқталды.

Дөңгелек үстелге қоғам қайраткерлері, Мәслихат депутаттары, Астана қаласының құрметті ардагерлері мен зиялы қауым өкілдері, еңбегімен ерекшеленген білікті мамандар қатысты. Олар құрылтай тұжырымдамасына сәйкес «Ұрпақтар сабақтастығы» тақырыбын талқылап, аға буын өкілдерін ұрпақ тәрбиесіне тарту туралы ой бөлісті. Мәселен, ішкі істер органдары және Ұлттық ұлан ардагерлер кеңесінің төрағасы, милиция генерал-майоры Өмірзақ Болсамбеков ардагерлердің қоғамдық өмірге белсенді қатысуының ұрпақ тәрбиесіне әсерін айта келе жас қызметкерлер арасында патриоттық тәрбие беру мәселелеріне де тоқталды.

— Ұлттық ұлан ардагерлер кеңесінің төрағасы ретінде айтар болсам, бүгінде қоғамдық бірлестіктің 45 филиалы бар. Онда есепте тұрған 80 мыңнан астам ардагер бар. Оның 5-уі Екінші дүниежүзілік соғыс ардагері, 200-дей еңбек майданының ардагері, 100 шақты Ауған соғысына қатысқан ардагерлер, бірінші, екінші топ мүгедектері мен 2000-нан астам зейнеткер бар. Бүгінде ардагерлер жас ұрпақ тәрбиесіне жақсы атсалысып келеді. Мен ардагерлердің қоғамдық өмірге белсенді қатысып жатқанын көргеніме қуаныштымын. Бұл жас ұрпақты адамгершілік пен патриоттыққа тәрбиелеуге, қызметтік дәстүрлерді сақтауға, жастар арасында полицей мамандығының имиджін сақтауға ықпал етеді. Қазір ішкі істер органдарының ардагерлері қоғамдық жұмыстарға белсене қатысып, түрлі іс-шараға қатысып, жинақталған тәжірибесі мен білімін бөлісе отырып, жас мамандарды үйретіп, жастармен патриоттық жұмыстарға үлкен көңіл бөлуде, — деп атап өтті Өмірзақ Болсамбеков.

Сондай-ақ жиында Президент жанындағы Мемлекеттік басқару академиясы Басқару институтының директоры Зұлфухар Ғайыпов та сөз алып, Мемлекет басшысы айтқан «Адал азамат» ұғымына кеңінен тоқталды.



«Мемлекет басшысы отаншылдық, адамгершілік, білімпаздық, нағыз маман болу, үнемшілдік, еңбекқорлық, ел мен жерге жанашырлық сияқты асыл қасиеттер бәрінен биік тұруға тиіс екенін айтты. Осындай ізгі қасиеттің бәрін бойына сіңірген жанды Адал азамат деген бірауыз сөзбен сипаттауға болады», — делі. Міне, біз де осы ретте Президенттің осы сөзінен нәтиже шығаруымыз керек. Нағыз отаншылдық, отансүйгіштік дегеніміз — ел мен жерге жанашырлықтан бөлек білімпаздық пен еңбекқорлық. Ұлы Абай «Адал еңбекпен мал іздемек — арлы адамның ісі» дегені де осыны мензейді. Біз осы идеологияны басшылыққа алып, іргелі құндылықты ұрпақ санасына сіңіре берудіміз керек», — дейді Зұлфухар Ғайыпов.

Кеш қонағы ретінде шақырылған батыр-полицей Арман Сәрсембаев «Ерлігі үшін» медалімен қандай ерлік істері үшін марапатталғаны және адал еңбек жетістіктерге жетелеп, абыройға бөлейтінін айтты.

Сонымен қатар дөңгелек үстел жұмысына қатысқан жас маман, My Mind медициналық технологиялар саласындағы стартап әзірлеушісі Ю. Тумгоев жастардың ғылымға сіңірген еңбегі мен аға буын өкілдерінің өнегелі істері арқылы жас мамандарды еңбекке баулу туралы ойын білдірді.

«Адал азамат — Адал Еңбек — Адал табыс» атты дөңгелек үстелде блиц-сауалнама мен орталықтың қызметі туралы бейнематериал көрсетілді.

Кеш соңында Белсенді ұзақ өмір сүру орталығының директоры Мұхтар Еркетаев дөңгелек үстел қатысушыларына алғысын білдіріп, ұрпақтар сабақтастығын жалғастыруда зейнеткерлердің мол тәжірибесі мен нақыл сөздері маңызды екенін баса айтты.

# ҚОС ДИПЛОМДЫҚ БАҒДАРЛАМАНЫҢ БЕРЕРІ МОЛ

Ғылым және жоғары білім министрі Саясат Нұрбек Қазақ ұлттық аграрлық зерттеу университетінің базасында «Ташкент ирригация және ауыл шаруашылығын механикаландыру инженерлері институты» Ғылыми зерттеу университетінің филиалын құру туралы бұйрыққа қол қойды.

Мемлекет басшысы Қасым-Жомарт Тоқаев 2022 жылғы 1 қыркүйектегі Қазақстан халқына Жолдауында агроөнеркәсіптік секторды дамытудың басым бағыттарын айқындай отырып, нарықта сұранысқа ие мамандарды даярлау үшін күшті базалық жоғары оқу орнын анықтау жөнінде нақты міндеттер қойған болатын.

Былтыр екі елдің Премьер-Министрлері орынбасарлары, Ғылым және жоғары білім, ӨР Жоғары және орта арнаулы білім министрлерінің орынбасарлары, KazNARU мен «ТИАШМИИ» ҒЗУ ректорлары кездесіп, KazNARU базасында филиал ашу мәселесін жан-жақты талқылаған болатын. Нәтижесінде, KazNARU базасында филиал ашу жөніндегі Жол картасы қабылданып, ӨР Жоғары білім, ғылым және

инновация министрлігі мен ҚР Ауыл шаруашылығы министрліктері бірауыздан келісімге келген. Сонымен қатар екі елдің ЖОО арасындағы 2028 жылға дейін ғылым-білім беру қызметі саласындағы ынтымақтастық туралы бірлескен Шартқа қол қойылды.

«Ташкент ирригация және ауыл шаруашылығын механикаландыру инженерлері институты» Ғылыми зерттеу университетінің тарихы 1923 жылдан басталады. Оқу орны алғашқыда Түркістан мемлекеттік университетінің базасында, 1929 жылы Орталық Азия мақта-иригациялық политехникалық институты болып құрылған.

Еске сала кетейік, жакында KazNARU Басқарма Төрағасы — Ректор ҚР Ақылбек Күршібаев пен «ТИАШМИИ» ҒЗУ Ректоры Баходир Мирзаев Алматыда кездесіп, Су Хабының негізгі оқу аудиториялары мен ғылыми зертханаларының жұмысымен танысып шықты. Сонымен бірге тараптар филиалдың ашылуына қатысты инфрақұрылымды дамыту; қаржыландыру көздерін қарастыру; оқу процесін жетілдіру үшін заманауи оқу және ғылыми әдебиеттермен қамтамасыз ету; су ресурстарын басқару, суды пайдалану, мелiorация және жерді

# СПОРТШЫЛАР ЭКОАКЦИЯҒА ҚАТЫСТЫ

Елордада «Таза Қазақстан: Астана — тазалық пен тәртіптің үлгісі» экологиялық акциясы өтіп жатыр. Астана қаласын көгалдандыру ісіне әлем чемпиондары мен Париж Олимпиадасына жолдама иегерлері және қалалық Спорт басқармасына қарасты №3 балалар мен жасөспірімдер спорт мектебінің тәрбиеленушілері белсене қатысты.

Сымбат БАУЫРЖАНҚЫЗЫ

Аталған эоакция аясында Алматы ауданына 6 300 түп ағаш отырғызу жоспарланған. Сенбілікте спортшылардың үлесіне тиген бас-аяғы 30-ға жуық жеке ағашы отырғызылды. Көгалдандыруға бокстан ұлттық құраманың бас бапкері Мырзағали Айтжанов, белгілі боксшылар — Сәкен Бибосынов, Махмұд Сабырхан, Асланбек Шымберген, Айбек және Нұрбек Оралбайлар, Қамшыбек Қонқабаев қатысты.

«Бүгінгі көгалдандыру жұмысына №3 балалар мен жасөспірімдер спорт мектебінің 26 оқушысы мен Париж

Олимпиадасына жолдама алған 10 спортшы қатысып жатыр. Абаттандыру уақыты аяқталғанға дейін ауданда 6 300 ағаш отырғызылатын болады. Бұл шараға спортшылардың қатысуының басты себебі — қала тұрғындарын «Таза Қазақстан» акциясына баулу және оларды шақыру, өсіп келе жатқан келешек чемпиондармен бірге нетуоркинг арқылы тәжірибелерімен алмасу. Экоакцияның көмегімен біз жастарды, елорда тұрғындары мен қонақтарын спортпен шұғылдануға және қаланың тәртібі мен экологиялық жағдайына мән беруге шақырамыз», — дейді Астана қаласы Дене шынықтыру және спорт басқармасы басшысының орынбасары Исламбек Байманов.



Париж Олимпиадасына жолдама алған балалары қолғап шебері Айбек Оралбай қаланың тазалығына мән беру әр тұрғынның міндеті екенін айтты.

«Президент Қасым-Жомарт Тоқаевтың тапсырмасына сәйкес, бүкіл ел

бойынша «Таза Қазақстан» экологиялық акциясы өтіп жатыр. Бүгін біз Алматы ауданында ағаш отырғызуға қатыстық. Елорданың барлық тұрғынын қаланың дамуы мен тазалығына үлес қосуға, оны өз ауданынан бастауға шақырамын. Өр

тұрғын осы акцияларға қатысып, қаланың тазалығына мән беруі керек. Егер оны өзміз тазға ұстамасақ, басқа елден келгендер тазалықпен қарайды деп ойламаймын. Бұл үйдегі балаға берілетін тәрбиеден басталады», — дейді спортшы А. Оралбай.

Сәкен Бибосынов — Токио Олимпиадасының қола жүлдегері, Париж Олимпиадасына жолдама иегері абааттандыру істеріне бірнеше рет қатысыпты.

«Республика денгейінде өтіп жатқан эоакцияға біз де қатысып, қаланың тазалығына үлес қосып жатырмыз. Ел көлемінде өтетін мұндай жұмыстарды қолдаймыз, сондықтан барлық қазақстандықты аталған акцияға қатысуға шақырамын. Осының алдында Түркістан қаласындағы «Таза Қазақстан» акциясына қатысып едім, енді бүгін елордамыздың тазалығына үлес қосу бұйырыпты», — деді боксшы Сәкен Бибосынов.

Ауқымды эоакция аясында жасыл желек отырғызу мен оларды күтіп ұстау, аула-көшені тазалау жұмыстары әлі жалғасуда. Осындай шараға қатысқан аудан тұрғындары арасында қоғамдық мәдениет денгейі артып келеді.



(Басы 1-бетте)

Наурызбек САРША

Бүгінде бұл екі мекеменің штаты бірнеше есе қысқартылғанын айта кеткен жөн. Кеңес заманында Қазақстанда су саласының мамандары көбіне Жамбыл гидромелиоративтік-құрылыс институтын (ЖГМҚИ) және оның Қызылордадағы филиалын оқып, тәмамдаған. Ғылым және жоғары білім министрлігінің мәліметі бойынша, институт инженер мамандарды дайындаған, оқу орнындағы оқытушылар құрамында жоғары білікті мамандар болған. Сонымен қатар бұл институттың қуатты зертханалық базасы және ғылыми инфрақұрылымы болған. Бүгінде сарапшылар кеңестік жүйеде оқыған мұғалімдердің зейнеткерлікке шыққанын, ал жаңадан келген мұғалімнің көп жағдайда практикалық тәжірибесі жоқ екенін және жергілікті жерде жұмыс бола бермейтінін айтады.

Су ресурстарын басқару жүйесін дамыту тұжырымдамасында мемлекет су шаруашылығын «кадрлармен қамтамасыз ету» бойынша бірнеше кадамды атап көрсетеді. «Су шаруашылығының имиджін жақсартуды» жоспарлап, жалақыны көтеру шараларын қолға алуды жоспарлап отырғаны да көрсетілген. Кадр даярлайтын базалық оқу орны ретінде М.Х.Дулати атындағы Тараз өңірлік университеті (ТарӨУ) таңдалды. Иә, су мамандары дегенде есімізге Кеңес Одағы кезіндегі Тараз қаласындағы Гидромеларативтік—құрылыс институтының даңқы түседі. Еліміздегі ең алғаш су шаруашылығы мамандарын даярлап, кадрмен қамтамасыз еткен осы білім ордасы болатын. Жуырда Президент Тараздағы гидромелиоративтік-құрылыс институтын қайта қалпына келтіру жөнінде шешім шығарды. Сондай-ақ су саласындағы мамандарды даярлау бойынша базалық ЖОО-ны анықтауды тапсырды. Біз осы ретте, кезіндегі Жамбыл гидромелиоративтік-құрылыс институтының түлегі, М.Х.Дулати атындағы Тараз өңірлік университетінің қауымдастырылған профессоры, Тараз қалалық маслихатының депутаты Кенжеғали Шилібектен аталған мәселедегі ойын білуге тырыстық. Оның айтуынша, Президенттің Тараздағы гидромелиоративтік-құрылыс институтын қайта қалпына келтіру жөніндегі шешімі — дұрыс шешім әрі батыл қадам.

«Суды тиімді пайдалану және басқару, реттеу стратегиялық маңызды. Бұл



Елдар ҚАБА (қолжазба)

# СУ САЛАСЫНДА КАДР ТАПШЫ МА, ҚАДІР ТАПШЫ МА?

тіндігін көрсетті. Сондықтан 17 аймақ басшылары, жылына мақсатты гранттармен 10 талапкерді жіберу керек, оларға қосымша шәкіртақы тағайындау қажет. Бұл даярланатын кадрлардың сапасына, профессор-оқытушылар құрамының әлеуетін арттыруға оң өзгерістер әкеледі. Су бағытында оқитын студенттерге ерекше статус беріп, олардың шәкіртақысын көтеру және жалақысы жоғары жұмыспен қамтамасыз ету қажет. Сонда ғана мемлекет тарапынан беріліп отырған білім гранттарын толық игеруге мүмкіндік болады. Сонда ғана біз бұрынғы гидро институттың беделін қайта әкеле аламыз», — дейді ол.

Кенжеғали Шилібек сонымен қатар су саласына мамандар дайындаудағы кейбір мәселелерге тоқталды.

«Су саласына мамандар дайындаудағы жоғары оқу орынын өкілі ретінде кадр тапшылығына келер болсам, біріншіден, су шаруашылығындағы білім беру бағдарламаларына сұраныс аз. Мемлекеттік тапсырыс, облыс әкімі бөлген білім беру гранттары жыл сайын игерілмеуде. Мысалға, 2022—2023 оқу жылында 6B086 «Су ресурстары және суды пайдалану» білім беру тобына жалпы 328 орын бөлінді, оның 90-ы қысқартылған білім беру бойынша, яғни колледж бітірушілеріне, «Серпін»

дері қатысып, су мамандарын даярлау тақырыбы қозғалған еді. Онда «Болашақ» бағдарламасына өзгерістер енгізіліп, оған «Гидрогеология», «Су ресурстары және су қауіпсіздігі» секілді су саласының мамандықтары қосылғаны айтылып, биылдан бастап қазақстандық студенттер аталған мамандықтар бойынша шетелде білім ала алатыны жария болған еді. «Біз үшін су саласы мамандығын тартымды ету маңызды. 2024 жылдың басынан бері су шаруашылығы қызметкерлерінің еңбекақысы орта есеппен 22 пайызға өсті. Бұған Су ресурстары және ирригация министрлігі әзірлеген іс-шаралардың арқасында қол жетті. Сонымен қатар отандық су саласының кадрлық әлеуетін арттыру үшін министрлік су шаруашылығы мамандарын қайта даярлауды және олардың біліктілігін арттыруды жоспарлап отыр», — деген еді сонда Нұржан Нұржігітов.

Бүгінде елімізде 10 оқу орны су саласының мамандарын даярлайды. Ал қазір су мамандықтары бойынша 2 500-ге жуық студент оқиды. Дегенмен студенттерге нағыз маман иесі болуы үшін де көптеген жұмыс кезегін күтіп тұрған секілді. Бұл ойды Кенжеғали Шилібек те қостайды.

«Тәуелсіздік алғанға дейін бізде ұлттық білім, ұлттық тәрбие беру жүйесі кеңестік сипатта қалыптасты деуге болады. Менің ойымша, мұның басты себебі батыстық білім беру жүйесі — «Болон» үдерісін қолданысқа енгізгеніміз болды. Еуропа елдерінің ортақ білім беру жүйесіне ену мақсатында Орталық Азия елдерінен бірінші болып, Қазақстан «Болон» үдерісіне 2010 жылы енді. «Болон» үдерісіне ене отырып, отандық білімнің бәсекелестікке қабілеттілігін арттыру, үш сатылы жоғары білімді енгізу, академиялық кредиттер жүйесін қабылдау, білім сапасын бақылау, студенттер мен оқытушылардың мобильділігін кеңейту көзделді. Бұл жүйе отандық білім жүйесін еуропалық озық тәжірибелер мен ғылыми жаңалықтарды батыл енгізу арқылы халықаралық үлгіде дамытуға мүмкіндік берді. Таяқтың екі ұшы бар дегендей біз, техникалық мамандарды дайындауда біраз құндылықты жоғалттық. Болашақ инженерлер білуге тиіс қажетті инженерлік-техникалық пәндер оқу үдерісінен алынып тасталды, не болмаса мазмұны өзгеріп, сағаттары қысқартылды. Білімді бағалау жүйесі өзгертілді. Нәтижесінде, көпшілік студент үшін оқу орындарындағы негізгі мәселе сапалы білім алу емес, жоғары балл жинау, мамандық игеру емес, диплом алу болып кеткені жасырын емес. Оның үстіне бұл мамандықтарға Ұлттық бірыңғай тестілеуден ең төменгі шекті балл алғандардың мемлекеттік грантка түсуінің әсері де жоқ емес. Сонымен қатар жастар су саласына қызықпайды. Өйткені бұл саладағы мамандардың қоғамдағы мәртебесі төмен. Айлық жалақысы аз. Жоғарыда айтқандай, су бағытында оқитын студенттерге ерекше статус беріп, олардың шәкіртақысын екі-үш есеге дейін көтеру және соңғы курсты дуалды оқытуға көшіріп, мекемеде айлық жалақымен жұмыс істеуге мүмкіндік беру қажет. «Дипломмен ауылға» мемлекеттік бағдарламасына су саласының түлектерін тартуымыз керек. Мамандардың әлеуметтік қамтамасыз етуді кепілдендіру, біліктіліктерін жүйелі арттыру, жалақы-

ны көтеру, сала еңбеккерлерін насихаттау арқылы ғана су мамандарының мәртебесін жақсарту аламыз», — дейді ол.

## КАДРҒА ҚАЖЕТТІЛІК 800 АДАМҒА ДЕЙІН АРТАДЫ

Сарапшылар гидромелерация мамандығын «ен қажетсіз мамандық» деп атап көрсеткен екен. Мұның бір себебі бұл мамандыққа сұраныстың азаюы, оқыту кезінде практикалық тәжірибенің жоктығы мен жергілікті жерде жұмыс бола бермейтіні. Мамандар инженер-мелиоратор топырақтың құнарын жақсартуға және шаруашылықты ұйымдастыруға жауапты жан екенін айтады. Оның жұмыс ауқымы кең, жауапкершілігі де орасан. Ол жер суландыру техникаларын, топырақтың коректену режимін дұрыс пайдалануды, ауылшаруашылық дақылдарынан тұрақты және мол өнім алудың тиімді жолдарын ұсына алатын, канал, тоған, су қоймалары мен бөгендердің техникалық қауіпсіздігін болжай білетін, гидрологиялық қолайсыз жағдайларын жақсарту отырып, жер қорын өте тиімді түрде пайдалану әдістерін меңгерген маман. Алайда біздің шаруа қожалықтары мұндай маман иесін қажет етпейді. Осыдан келіп әркім өз әрекетімен жерді пайдалануда. Нәтижесінде, жер сортаңданып, тұзданып, тозып, экологиялық мәселелер туындап жатыр.

Иә, бізге саладағы проблемалардың алдын алу мақсатында алдағы уақытта, «Гидротехникалық құрылыс және құрылымдар», «Су ресурстарын басқару», «Гидромелиорация», «Елді мекендерді сумен қамтамасыз ету және суды бұру», «Гидрогеология және инженерлік геология», «Су шаруашылығының экономикасы», «Су дипломатиясы», «Мелиоративтік жұмыстарды механикаландыру», «Гидроэнергетика» сияқты білім беру бағдарламалары бойынша мамандар даярлау аясын кеңейтуіміз керек. Себебі болжам бойынша, 2029 жылға қарай кадрға қажеттілік 800 адамға дейін артады, ал оларды даярлау үшін 350-ге жуық педагогика маманы қажет болады екен. Оның ішінде 170 маманның ғылыми дәрежесі болуы керек. Мұнша мамандарды аз уақыттың ішінде даярлай алу да оңайға соқпаса анық. Дегенмен Үкімет қолынан келгенін жасап бағуда. Ғылым және жоғары білім министрлігінің мәліметі бойынша, су шаруашылығы саласына кадр даярлауға жыл сайын 400-ден астам орын бөлінеді, ал жана тұжырымдамада грант санын арттыру қарастырылған. Оқу-ағарту министрлігінің баспасөз қызметі бүгінде

су мамандарын даярлауда еліміздің төрт макроөңірі таңдалғанын, онда экономика салалары бойынша, оның ішінде су саласының болашақ мамандарын даярлайтын тірек колледждер құрылатынын айтады. Айта кетейік, бүгінде еліміздің бес колледжі су саласының мамандарын даярлайды. И.Әбдікәрімов атындағы Қызылорда аграрлық-техникалық жоғары колледжі, Мактаарал аграрлық колледжі, Түлкібас агробизнес және туризм колледжі, Үшқоңыр су шаруашылығы колледжі және Манап Өтебаев атындағы жана технологиялар жоғары колледжінде гидрогеология саласының 300-ге жуық болашақ мамандары оқиды және олардың 90%-ы мемлекеттік білім беру тапсырысы бойынша білім алады.

Сонымен қатар 2024-2025 жылдары «Сумен жабдықтау және су бұру жүйелерінің тазарту құрылыстарын пайдалану», «Гидротехникалық мелиорация» және «Гидротехникалық құрылыс» және тағы басқа мамандық бойынша техникалық және кәсіптік білім беруде мемлекеттік білім беру тапсырысын ұлғайту жоспарлануда. Сондай-ақ жуырда Су ресурстары және ирригация министрі Нұржан Нұржігітов Француз даму агенттігінің (AFD) өкілдерімен кездесіп, су саласындағы ынтымақтастық мүмкіндіктерін талқылаған еді. Агенттік өкілдері Мемлекет басшысы Қасым-Жомарт Тоқаевтың Франция президенті Эммануэль Макронмен жақында өткен кездесуінен кейін қос тарап су секторын қоса алғанда, түрлі бағыттағы ынтымақтастықты белсенді түрде нығайтуға ниетті екенін атап өтті. Қонақтар 100-ге жуық келде жұмыс істейтін AFD бірлескен жобалар бойынша техникалық сараптама, несиесі түрінде ұзақ мерзімді қаржыландыру және техникалық-экономикалық негіздеме дайындауға гранттар беруге дайын екенін хабарлады. Сондай-ақ Француз даму агенттігінің өкілдері Астана қаласында қазақстандық филиал ашуға ниет білдіріп отырған көрінеді. Сол жиында Нұржан Нұржігітов Су ресурстары және ирригация министрлігі отандық су саласының мамандарын оқыту және біліктілігін арттыру үшін француз мамандарын тартуға қызығушылық танытып отырғанын, сондай-ақ Франциялық сарапшыларды елдің су шаруашылығы объектілерінің ағымдағы жай-күйі туралы дерек жинайтын ахуалдық ақпараттық орталықтың жұмысына тарту мәселесін де қарауды ұсынды.

## ТҮЙІН:

2023 жылы аграрлық және су салалары бойынша мемлекеттік білім беру гранттарын игеру көлемі небәрі 59%-ды құраған. Мәселен, былтыр «Су ресурстары және суды пайдалану» мамандығына бүкіл ел бойынша 101 адам ғана келіп түсіп, мемлекеттік гранттардың 70%-ы игерілмей қалыпты. Ғылым және жоғары білім министрлігі қазір 10 ЖОО су ресурстары саласында кадр дайындап жатқанын айтады. Көпшілігі «Су шаруашылығы» және «Су ресурстары» мамандығы бойынша оқиды, ал инженер мамандар тек М.Х. Дулати атындағы Тараз өңірлік университетінде оқытылады. Жалпы, елімізде су мамандарын негізінен Қазақ Ұлттық аграрлық зерттеу университеті, Қорқыт ата атындағы Қызылорда университеті, М.Әуезов атындағы Оңтүстік Қазақстан университеті, Д.Серікбаев атындағы Шығыс Қазақстан техникалық университеті, Х.Досмұхамедов атындағы Атырау университеті, Қазақ-Неміс университеті даярлайды. Соңғы кездері басқа да жоғары оқу орындарында су бағытында білім беру бағдарламаларын ашып, болашақ су мамандарын даярлауда. Енді осы бағытта жұмыстар өз нәтижесін береді деп сенеміз. Алаңсыз жүргенде саламыз мамансыз қалмасын.



еліміздің экономикалық дамуына тікелей әсер етеді. Су саласындағы қордаланған мәселелерді шешуге бағытталған мамандарды қалыптастыру үшін базалық жоғары оқу орны болып табылатын Дулати университетінен бұрынғы Жамбыл гидромелиоративтік-құрылыс институтын бөліп, қалпына келтіру ұтымды шешім. Институттың оқу ғимараттары, жатақханалары, су саласына бейімделген зертханалары, спорт кешендері қаржы көздерін үнемдеуге мүмкіндік береді. Тараз қаласында орналасқан Қазақ су шаруашылығы ғылыми-зерттеу институтымен арадағы ынтымақтастық оң әсерін тигізеді. Шыны керек, бұрынғы одаққа танымал болған Жамбыл гидромелиоративтік-құрылыс институтын қалпына келтіруде Үкіметтің қолдауы керек. Білікті мамандардың жасы ұлғайған, білікті су мамандары жан-жақта шашырап жүр. Су мамандары қазір 10 жоғары оқу орындарында даярланады, сондағы ғалымдарды жана оқу орнына шоғырландырып, студенттерді тек базалық оқу орнында бір жерден оқытуды жүзеге асыруды қолға алу керек. Саладағы ғалымдардың әлеуметтік жағдайын жапсап, жоғары жалақы тағайындау қажет. Барлық жоғары оқу орнында су саласында студенттер контингенті аз екені мәлім. Су бағытындағы білім беру бағдарламаларын кез келген жоғары оқу орындарында аша беруді тоқтату керек. Керісінше, республикадағы су бағытындағы білім беру бағдарламаларын тек бір жерде, яғни жаңадан құрылатын оқу орнында жүзеге асыру тиімді болмақ. Мемлекет тарапына білім гранттарын көптеп бөлу мәселені толық шешпейді. Су тасқыны мамандардың жетіспей-

## «ТЕХНИКАЛЫҚ МАМАНДАРДЫ ДАЙЫНДАУДА БІРАЗ ҚҰНДЫЛЫҚТЫ ЖОҒАЛТТЫҚ»

Жуырда өткен Су ресурстары және ирригация министрі Нұржан Нұржігітов пен Ғылым және жоғары білім министрі Саясат Нұрбек су саласының мамандықтары мәселелері бойынша бірлескен кеңесінде жоғары оқу орындары мен ғылыми-зерттеу институттарының өкіл-







# СЕМЕЙ КРЕАТИВТІ ЖАСТАРДЫҢ ОРТАЛЫҒЫНА АЙНАЛАДЫ



**Семейде креативті индустрия паркі ашылды. Аталған алаң өңірдегі шығармашылық саланың дамуына тың серпін бермек. Облыс әкімі Нұрлан Ұранхаев креативті индустрияны дамыту паркіне барып, шығармашылық өнер адамдарымен жүздесті.**

Семей қаласының «Қарағайлы» ықшамауданындағы көпқабатты үйлердің бірінші қабатынан тегін берілген орынның жалпы аумағы — 570 шаршы метр. Бұл алаңда облыс тұрғындары мен шығармашылыққа жакын жастар өз жобаларын іске асыруына мүмкіндік бар. Облыстық креативті индустрия паркінің директоры Асхат Бейсембаев парктің әлі де техникалық тұрғыда толықтырылып жатқанын айтты. «Осы жылдың 6 мамыры күні жергілікті дизайнерлердің Show room дизайнерлік — сән студиясының техникалық ашылуы өтті. 13 мамырдан бастап паркте сән салоны жұмысын бастады. Оны жүзеге асырып жатқан белгілі дизайнер, Brilliant шығармашылық мектебінің негізін қалаушы Мәдина Еділбекова. Бұл жоба әртүрлі стильде жұмыс істейтін облысымыздың дизайнерлерінің басын қосатын болады», — дейді ол.

Бүгінде креативті индустрия паркінде жүзеге асып жатқан жобаның бірі — Talqulike жобасы. Жоба қазақ тарихы мен мәдениетін жаңғыртып, ұлттың бай мұрасын болашақ ұрпаққа ұсынады. Мұнда оқырман клубы, жазушылар клубы, кисса-дастандар клубы жұмыс істейді. Семей жастары Talqulike-тың алғашқы басқосуында Санжар Керімбайдың «Өзбекәлі және мәдени майдан» кітабына талдау жасап, ұлт тарихына өлшеусіз үлес қосқан қайраткер Өзбекәлі Жөнбектің тұлғалық болмысымен танысыпты.

«11 мамыр күні жазушы Қабдеш Жұмаділовтің «Соңғы көш» романына талдау жасалды. Осылайша, шығармашылық салаға ғылыми-шылығы бар кез келген азаматқа мүмкіндік туып отыр. Жастар өзінің креативті жобаларын осы жерде жүзеге асыра алады. Бұдан бөлек, толыққанды дыбыс жазу студиясын іске қосуды жоспарлап отырмыз. Түрлі медиконтент әзірлейтін подкаст, стэндап жасайтын алаңдарымыз бар. Таяуда «Ойсалар talks» деп аталатын подкасттың түсірілімін өткіздік. Спикерлер мен креативті индустрия өкілдері осы бағытты дамыту бойынша өз тәжірибелерін айтып, идеяларымен бөлісті», — дейді Асхат Бейсембаев.

Одан бөлек, креативті индустрия паркінің басшылығы Семейдегі Әлихан Бөкейхан университетімен бірлесіп, оқу орны базасында технологиялық кластер

құруды көздеп отыр. «Бүгінде дейін бірқатар жоба жүзеге асып та үлгерді. Кретивті, талантты жастарымыздың өзін өзі дамытуына, шығармашылық жұмыстарымен айналысуына, жоба әзірлеуіне мүмкіндік беретін аukumды алаң жасаймыз деген жоспарымыз бар. Бұл біздің парктің негізгі мақсаты», — деп атап өтті креативті индустрия паркінің директоры.

“  
Абай облысында отандық дизайн өнерінің дамуына өз үлесін қосып келе жатқан Мәдина Еділбекова креативті индустрияның келешегі алда деген сенімде. «Осыдан 8 жыл бұрын сіңілім екеуміз өз күшімізбен дизайнерлерге арналған шағын мектеп ашқан болатынбыз. Ол кезде ақшамыз аз, әлі есімде 40 мың теңге көлемінде қаржымыз болғанына қарамастан істі бастап кеттік. Дегенмен «тәуекел түбі — желқайық» дегендей еңбек етсең ұзамай жемісін де көреді екенсің», — дейді бүгінде Brilliant шығармашылық мектебінің негізін қалап отырған кәсіпкер.

Айта кетейік, Мемлекет басышысының тапсырмасынан кейін елімізде креативті жобаларды жүзеге асыру бойынша арнайы жоба әзірленген болатын. Үкімет 2021-2025 жылдарға арналған креативті индустрияны дамыту тұжы-

кино және телебағдарламаларды өндіруге, театр және музей өнеріне, сәулет және дизайнға, колөнер бұйымдарына, халық шығармашылығына және кәдесыйлар өндірісіне әсер етеді деп болжап отыр.

Абай облысында отандық дизайн өнерінің дамуына өз үлесін қосып келе жатқан Мәдина Еділбекова креативті индустрияның келешегі алда деген сенімде. «Осыдан 8 жыл бұрын сіңілім екеуміз өз күшімізбен дизайнерлерге арналған шағын мектеп ашқан болатынбыз. Ол кезде ақшамыз аз, әлі есімде 40 мың теңге көлемінде қаржымыз болғанына қарамастан істі бастап кеттік. Дегенмен «тәуекел түбі — желқайық» дегендей еңбек етсең ұзамай жемісін де көреді екенсің», — дейді бүгінде Brilliant шығармашылық мектебінің негізін қалап отырған кәсіпкер.

Биыл халықаралық әйелдер күні мерекесі қарсаңында Мәдина Еділбекова «Ару-Ана» үздік әйелдер жобасы байқауында «Креативті индустрия саласындағы үздік жоба» номинациясы бойынша жеңімпаз деп танылды. Ендігі мақсат облыстағы жас дизайнерлерді республика деңгейінде танытып қана қоймай, отандық сән үлгілерін шетелдерге де шығарып, бренд қалыптастыру қажет. «Қазір коллекциялық өнімдерімізді әзірлеп жатырмыз, маусым айының соңына қарай үлкен көрсетілім ұйымдастырып, дизайнерлердің конкурсын өткіземіз. Жеңімпаздарға жүлделі сыйлықтар беріледі.



рымдамасын бекітті. Депутаттық корпуспен бірлесіп креативті индустрияны қолдау мәселелері бойынша бірқатар заңға өзгеріс пен түзету жобасы енгізіліп, салықтық жеңілдікте қарастырылды. Мәселен, креативті индустрия саласындағы бизнес бұдан былай КТС, жеке табыс салығы, ККС төлеуден босатылып, бірінғай салықты ғана төлемек.

Бұл жеке кәсіпкерлер үшін 2%-дан 4%-ға дейін, ЖШС үшін 8%-ға дейін болады. Тек компанияның жылдық айналымы 2,2 миллиард теңгеден аспауы, ал штатта 200 адамнан көп болмауы қажет. Сарапшылар салықты жеңілдету

Түрлі номинация бойынша жүлде тағайындалады. Одан бөлек, жақында қалалық деңгейде коворкинг орталығын ашпақпыз. Бизнес инкубатор жобасын жетілдіру үшін осындай жан-жақты қамадар жасап жатырмыз. Менің ойымша, жастарымыз бизнеспен айналысып, қаржылық жағынан тәуелсіз болса, мүмкіндіктері ашылса біздің қаламыз да дамиды, көркейеді. Жастардың экономикалық тұрғыда белсенділігін тиімді пайдалана білуіміз керек», — деп ой бөлісті М.Еділбекова.

Шығармашылық саласындағы жастардың пікірін тыңдап, креативті индустрия паркін аралап көрген аймақ басшысы жергілікті атқарушы билік тарапынан барлық қолдаудың болатындығын жеткізді. «Бұл жероблысымыздағы озық ойлы, жанашыл, креативті азаматтардың басқосатын, ой-пікір алмасып, идеяларын жүзеге асыратын орынға айналуы керек. Біз барлық бастамаға қолдау білдіреміз», — деді облыс әкімі Н.Ұранхаев.

Креативті индустрия паркі өңірдің шығармашылық адамдарын ортақ мақсатқа жұмылдырып, креативті экономиканы дамыту және өңірдегі инновацияларды ынталандыруға, біріктіруге арналған платформаға айналады деп күтіліп отыр.

Ұлағат БЕКБОЛАТ



## ЖАМБЫЛДА ЖАРҚЫН ЖОБА ЖАЛҒАСЫН ТАПТЫ

**Осыдан екі жыл бұрын Жамбыл облысында «Әулиеата жастары» өңірлік тұрғын үй бағдарламасы іске қосылған болатын. Жаңа жоба жастарды баспанамен қамтуға бағытталды. Бастапқыда бағдарламаның болашағына күмәнмен қарағандар көп болса, бүгінде жоба өз өміршеңдігін дәлелдеп отыр. Алайда биыл бағдарламаға қаржы қаралмайтыны айтылып, жастардың үміті үзілгендей болған. Бірақ күні кеше ақжолтай хабар жетіп, жобаның бойына қайта қан жүгірді. Биыл үміткерлерді қандай өзгерістер мен талаптар күтіп тұр. Зер салып, зерделеп көрсек...**

Екі жылға артқа шегініс жасасак, 2022 жылы бағдарламаға жергілікті бюджеттен 500 млн теңге бөлініп, 41 жас баспаналы болған. Оның 22-і денсаулық сақтау саласының маманы болса, 12-сі — білім беру, үшеуі — журналистика, екеуі — спорт, тағы екеуі — мәдениет саласының қызметкері.

Осылайша, пилоттық жобаның шарапатын көрген жастар алғысын қарша жаудырды. Сондай-ақ бағдарламаға қатысуға өтініш білдірушілердің де саны еселеп арта түсті. Осыны негізге алған облыстық Жастар саясаты мәселелері басқармасы қаржыландыру көлемін 2 млрд теңгеге арттыруға қол жеткізді. Оның 1 млрд теңгесі жергілікті бюджет есебінен бөлінсе, 1 млрд теңгені «Отбасы банк» АҚ өз тарапынан қарайды. Осылайша, басқарма мен банк арасындағы мәміле негізінде баспана бақытына кенелу мүмкіндігіне ие болғандардың саны еселеп артып, 677 өтінім қабылданады. Өтінімдер облыс әкімдігінің Цифрлық технологиялар басқармасы тарапынан әзірленген e-jambyl.kz платформасы арқылы қабылданып, комиссия шешіміне сәйкес 226 қатысушыға «Отбасы Банк» АҚ-на жолдама беріледі. Ал 451 өтінім бағдарлама талаптарына сай келмеуіне байланысты қанағаттандырылмайды. Жолдама алған 226 өтінім берушінің 82-і банктіріктеуінен өте алмаса, 144 азамат қоныс тойын тойлайды. Оның 132-і Тараз қаласынан болса, Байзақ ауданынан — 4, Қордайдан — 3, Т.Рысқұловтан — 2, Жамбыл, Талас, Шу аудандарынан бір-бір үміткер баспаналы болады. Осылайша, облыс орталығынан ғана емес, аудандардан да жастар баспаналарында бақыт шамын жағады.

Бұл, әрине жастар үшін үлкен қуаныш болғаны анық. Алайда жыл басында «баянды бағдарламаға енді қаржы қаралмайтын болды» деген мәселе айтылып, жастардың ұнжырғасы түсе бастаған. Кейіннен белгілі болғаны «Отбасы банк» өз тарапынан қарайтын қаржыны бөлуден бас тартып, олар үшін бағдарлама шарттары тиімсіз екенін алға тартқан. Алайда бұл мәселемен облыс әкімі Ербол Қарашөкеев тікелей айналысатынын айтып, жастарды желпініп қойған. Міне, осы уәде орындалып, жастар бағдарламаға қатысуға қайта мүмкіндік алып отыр. — «Әулиеата жастары» тұрғын үй бағдарламасы екі жылда 185 жасты баспанамен қамтыды. Ал «Отбасы банк» биыл бағдарламаға қаржы қарамайды деген мәселе болғаны рас. Алайда біз келіссөздер жүргізу арқылы банктен 1 млрд теңге бөлгізу туралы мәмілеге қол жеткіздік. Жергілікті бюджет тарапынан да биыл 1 млрд теңге бөлінеді. Осы 2 млрд теңгеге биыл 140-тан астам жасты баспанамен қамту көзделуде. Осылайша, бағдарламаның өміршеңдігін күш салу арқылы ұзартып отырмыз.

Биыл «Әулиеата жастары» өңірлік тұрғын үй бағдарламасына бірқатар өзгеріс енгізіледі деп жоспарлануда. Атап айтсақ, бағдарламаға денсаулық сақтау, білім, журналистика, мәдениет, спорт және дін салалары қызметкерлерімен қоса, мемлекеттік қызметшілер де қосылуы мүмкін. Сондай-ақ қарыздың ең

жоғары сомасы 15 млн теңгеге дейін болады. Бастапқы жарна 10 пайыз болса, пайыздық мөлшерлеме — 6%. Несие беру уақыты — 19 жыл. Сатып алатын тұрғын үйге көппәтерлі де, жер үй де қабылданады, — дейді Жастар саясаты мәселелері басқармасының басшысы Жомарт Зұлпыхар.

Бағдарлама қатысушысына қойылатын талаптарға келсек, өтінім беруші Қазақстан Республикасының азаматы болуға тиіс. Үміткердің жасы 35-тен аспауы қажет болса, бағдарламаға қатысушы соңғы жұмыс орнындағы лауазымында кемі 6 ай қызмет етуі керек. Бұдан бөлек, өтінім берушінің «Отбасы Банкіндегі» жинақ шотында сатып алатын үйінің 10 пайыздық ақшасы болуы міндетті. Сондай-ақ бойдақ болсын, ерлі-зайыпты болсын бастарында соңғы 5 жылда алған баспанасы немесе тұрғын үйге арналған жер учаскесі болмауы шарт.

Міне, осылайша бағдарламаға жаңа өзгерістер мен талаптар енгізілуде. Алайда бұл баспана алу жолын қиындатып емес, керісінше, жана мүмкіндіктерге жол ашып жатқан қадам. Себебі жоғарыда аталған сала мамандарына арналған бұған дейін мұндай жеңілдетілген тұрғын үй бағдарламасы болмаған еді. Сондықтан жастар пилоттық жобаға дән риза.

— Жасыратыны жоқ, бұған дейін журналистер ешқандай санатқа жатпағандықтан, тұрғын үй алуда көп қиналатын. Енді, міне бізге «Әулиеата жастары» жобасы үлкен мүмкіндіктерге жол ашып отыр. Бұл мүмкіндікті мұлт жібермей, былтыр бір бөлмелі үй алып алдым. Алғашқы жарнасын қуоға жақындарым көмектесе, кейіннен құжаттарын демеі жиналдым. Еш қиындықсыз банк іріктеуінен өтіп, бір ай ішінде сатып алатын тұрғын үйімді ұсындым. Алғаға шүкір, қазір өз баспанамдамын, — дейді журналист Жұматай Көксұбай.

Жастар арасында биылғы өзгерістерге қуанып отырғандар да аз емес.

— «Әулиеата жастары» жобасын естіп, қызығып жүретінмін. Алайда үміткерлер санатына мемлекеттік қызметшілер кірмейтіндіктен сырттан ғана сүйсініп қоятынмын. Енді, міне биыл бағдарламаға мемлекеттік қызметшілер де кіргелі жатқанын естіп, қатты қуандым. Бұйырғас, құжаттарымды жинап, биыл өтінім беремін деп тас-түйін дайын отырмын. Осындай бағдарламаға жан бітірген облыс әкімімен, Жастар басқармасына айтар алғысым шексіз, — дейді жас маман Едіге Нүрділде.

Иә, осылайша бағдарлама біреулердің асыл арманын орындап үлгерсе, енді екіншілерге үміт отын жағуда. Ең бастысы, жастар жоба жалғасын тапқанына дән риза. Осындай жастар игілігі үшін қызмет етіп жатқан бағдарламаның өміршеңдігі ұзақ болып, алдағы уақытта мемлекеттік бағдарлама дәрежесіне жетеді деп сенеміз. Сол кезде баспана бақытына кенелетіндердің саны тағы арта түсері анық.

Саятхан САТЫЛҒАН,  
Жамбыл облысы







**Айбек СЕРІКҰЛЫ,**  
*домбырашы:*

## Сымбат БАУЫРЖАНҚЫЗЫ

Айбек Серікұлы қазақ балаларынан бөлек, өзге ұлт өкілдеріне де домбырада еркін ойнауды үйретіп, ұлттық аспаптың қолданылу аясын кеңейтуге шама-шарқы келгенше үлес қосып жүр. Бір қызығы, домбыраның шанағынан күмбірлеген күй ғана емес, жастардың аузынан түспейтін заманауи әндердің ырғағы да төгіледі. Әртүрлі музыкалық шығармалар орындалатын парақшаның MUZBANDa аталуы да сондықтан. Музыка өнері Айбектің бойына атаның қанымен дарыса керек. Айтуынша, бес жасында әкесі ағаштан ойып жасап берген домбыраны қолынан тастамай өскен. Ауылдағы өнер мектебінде шығармашылығын шыңдап, А.Жұбанов атындағы Ақтөбе өңірлік университетінде музыкалық білімін жетілдіріпті.

«Біз – өнерлі отбасымыз. Марқұм әкем Серік Оралұлы – Мұғалжар ауданында беделді күйші болған кісі. Атам Орал акын болып, бірнеше рет «халық жауы» атанып, сотталған екен. Ағам Бейбіт Оралұлы – белгілі композитор. Әндерін «Арнау» тобы, Роза Рымбаева, тағы бірқатар әнші сахнада орындап жүр. Ал әпкем – опера әншісі. Күйді шеберлікпен орындауды әкемнен үйрендім. Бірақ маған арнайы уақыт бөліп, қасымда отырып үйретпейтін. Өзі бір-екі рет тартатын да, домбырасын қабырғаға іліп кетіп қалады. Артынша қайталап, талпынып үйреніп алдым», — дейді талантты Айбек.

Білім ордасында жүріп Бақытжан Бақауиевке, Момын Байғанинге шәкірт болған. Момын Байғанин — атақты Нүрпейіс Байғаниннің кіші ұлы. Өнер әлемінде із қалдырған тұлғалардың тәжірибесін бойына сіңірген Айбек Ораловтың шәкірті Димаш Тоқабай Қазақстанның барлық дерлік өңірінде болып, түрлі өнер байқауларынан Гран-при иеленген. Сонымен қатар Түркия, Грузия және Өзбекстан елдерінде өткен фестивальдерден де жүлделі орынмен оралған. Ерекше дарын иесі осындай шәкіртке ұстаздық еткеніне мақтанатынын айтты. Қазір істеп жүрген игі істерінің арқасында домбыраны әлемге танытуды мақсат еткен Айбек:

«Менің арманым — қазақтың кара домбырасын Еуропа, ТМД елдеріне таныту. ТМД құрамында он шақты мемлекет бар, әр елдің өзіне тән хит әні бар. Соларды орындап шығу — қазіргі бірінші кезекте тұрған жоспарым. Желіге жүктеткен видеоларыма жазылған пікірдің көбі шетелдіктер тарапынан келген. Аспаптын атын, оны қалай үйренуге болатынын сұрап жатады. Тіпті, АҚШ-тан домбыраның бағасы мен қалай алуға болатынын сұраған оқырман да болды. Қателеспесем, 2015 жылдары орыс балаларына домбыра үйретіп едім, бірақ олар Ресейге қоныс аударып кетті. Өздерімен бірге қазақтың өнерін де алып кетті. Бұл — қазақ домбырасы тағы бір шекара асты деген сөз. Қазір түрлі концерттерге қатысу үшін Украинадан, Германиядан, Ресейден ұсыныстар көп

Алматылық Айбек Серікұлы — шетелдік хит әндердің мақамын домбыра нотасына түсіріп, өзге халықтың таңданысын тудырып жүрген нағыз талант иесі. ТикТок желісінде MUZBANDa никнеймімен ашылған парақшада көбіне Еуропа, ТМД елдеріне тән әндерге түсірілген туторлар жарияланады.

# Домбыра ДЕГЕНДЕ ҚАЗАК ЕСКЕ ТҮСУІ КЕРЕК

түсіп жатыр. Соңғы Ресейден келген шақыртуларға белгілі себептермен келіспедім», — деді.

Ол көбіне шетелдің әнін домбырада орындауының себебі мақсатына жақындауға бір қадам екенін айтады. «Егер домбыра арқылы тек күй орындайтын болсам, онда домбыраны әлемге таныту қиынға түсер еді. Өйткені күй қазаққа ғана тән. Ал басқа елдің шығармасын домбыраға түсіру — сол елдің домбыраны қазақтың ұлттық аспабы екеніне көз жеткізуге итермелейді. Болашақта домбыраны қазіргі гитараның деңгейіне шығарғым келеді. Гитараны қазір дүниежүзі біледі, домбыра да болса екен деймін. әлем дегенде

шәкірттерім бар. Бәрі шетінен тұнып тұрған дарындар. Оған қоса, шетелдік

оқырмандарымның арасынан үйренуге ықыласы барлар ниеттерін білдіріп жазады.

Оған уақытымыздың сөйкес келмеуінен сабақ бере алмай жатырмын», — дейді ол. Домбыраға назары ауған жастарға күйдің де құдіретін еске салып отыру маңызды. Күй — тұнып тұрған философия. Қазақтың күйін тыңдау арқылы кез келген адамның ішкі жан дүниесі рухани байи түседі әрі ұлттық музыкаға деген қызығушылығы арта түсетінін алға тартты домбырашы. Сондай-ақ кез келген ән домбырада орындалғанымен, әуен мен домбыра арасындағы үндестік бірдей бола бермейді екен.

«Қазір джазды, әр елдің халық әндерін, классиканы және заманауи әндерді де тыңдаймын. Жан-жақты болған дұрыс қой. Өйткені бұл — әр заманның, әр жастың әндерін зерттеуге, домбырамен үндестігін сақтауға зор мүмкіндік. Қазіргі заманауи әндердің мелодикасы аз болғандықтан, домбырада әуені толық ашылмайды. Өз тәжірибемде байқағаным, Кеңестік кезеңдегі әуендердің мелодиясы көп, домбыра нотасына керемет түседі. Шәкірттеріме күрделі әндердің нотасын қағазға түсіріп үйреткенді жөн көремін. Мысалы, Моцарттың, Монтидің шығармаларын нотасына қарап-ақ жеңіл үйренуге болады. Ол үшін үйренушінің икемі, ішкі ұмтылысы мен әнді талдау қабілеті болса жеткілікті. Осы тұста айта кетейін, домбыраны үйренуге ниеттілер үшін музыкалық сауаттылық болуы керек деген қатып қалған ереже жоқ. Жастардың домбыраға деген қызығушылығы әлдеқайда артқан, бірақ сапа жағынан ақсап жүрміз», — деді А.Серікұлы.

Ұлттық аспаптың насихатын кеңейту үшін әлеуметтік желіні тиімді пайдалану керегін айтқан Айбек Серікұлы қазір украин қызымен бірлесе ортақ әуен шығарып жатыр. Қазақтың домбырасы мен украинның бандура аспабының қосарланған дауысы екі ұлттың ауызбіршілігін білдіріп тұратындай. Осы сияқты Венгрияның, Американың музыкант-гитаристерімен біріккен жобаларға да дайындық басталып кеткен. Гитарист рок ойнайтын болса, арадағы кідірісте домбырамен күй шертіледі. Одан бөлек, биыл Түркияның Измир қаласында «Измир маршы» шығармасының 100 жылдығына дайындық жүріп жатыр. Талантты домбырашы Айбек те осы мерейтойға қатысып, домбыраның мерейін асқақтатпақ. «Жігітке жеті өнер де аз» демекші, Айбек Серікұлы домбыраның құлағында ойнайтын шебер күйші ғана емес, шахмат үйрмесі арқылы балалардың ойлау қабілетін шыңдаумен де шұғылданады.

Талантты домбырашының өмірде де, өнерде де жиған тәжірибесі мол. Ол бүгінгі уақытқа дейін бір сәтке де шығармашылық ізденісін тоқтатқан емес. Қазір батыс әндерінің нотасын қағазға түсіріп жүр. Бұл да жас ұрпақ кәдесіне жарары анық.

## «МУЗЕЙ ТҮНІ»

## АСТАНАЛЫҚТАРДЫ ҚУАНТАДЫ

18 мамырда сағат 18:00-00:00 аралығында Қазақстан Республикасының Ұлттық музейінде халықаралық музейлер күніне арналған «Музей түні» акциясы шеңберінде «Музей — құндылықтар мекені» атты мәдени-танымдық іс-шара өтеді.



Іс-шараның мақсаты — рухани-мәдени құндылықтарды, халықмыздың тарихын, мәдениетін бір кеңістікке біріктіре отырып, әртүрлі жанр мен стильдегі өнер туындыларын ұсыну. Музей қызметін, ондағы экспонаттар мен жәдігерлерді кеңінен насихаттау. Бұл күні таңғы сағат 10:00-нан бастап «Балдырған гид» шолу экскурсиялары, Ұлттық музейдің ғылыми жобалар аясында жарық көрген кітаптардың тұсаукесері, картинамен мүсін туындыларына көшірме жасаудан шеберлік сыныбы мен Ұлттық музейдің жобалары аясындағы музейлік сабақтар өтеді.

Сағат 16:00-де Суретшілер одағының мүшесі Рафаэль Слекеновтің «Тәңір нұры» атты жеке көрмесі ашылады. Сағат 18:00-ден бастап музей қонақтарына Роза Бағланова атындағы «Қазақ-концерт» мемлекеттік концерттік ұйымының концерті, көпөнерші-

лер жәрменкесі, «Дала кескіндемесі: рәміздер, бояулар, бейнелер» мен «Ерлікке тағзым — елдіктің белгісі» көрмелері, Ұлттық музейдің Консервация және қалпына келтіру қызметінің шеберлік сабақтары, «Музей қорындағы атақты тұлғалар домбырасының үнін жаңғырту» атты лекция-концерт ұсынылады.

Сонымен қатар көрермен үшін театрландырылған экскурсия, «Жұлдызды гид. 10 жұлдыз. 10 жауһар» шоу-жобасы ұйымдастырылады. Аталған мәдени іс-шара Ұлттық музейде дәстүрлі түрде ұйымдастырылып келеді. Өткен жылы келушілер саны 48 мыңға жуықтаған. Айта кетейік, «Халықаралық музей күні» мерекесі 1977 жылы халықаралық музейлер кеңесінің бас конференциясында бекітілген. Сол жылы алғашқы «Музей түні» іс-шарасы Берлин қаласында өтті.

## ЖАСАНДЫ ИНТЕЛЛЕКТ САЛҒАН СУРЕТТЕР КӨРМЕСІ



«Таза Қазақстан. Астана — тазалық пен тәртіптің үлгісі» атты ауқымды экологиялық акциясы аясында ChatGPT көмегімен салынған суреттердің фотокөрмесі өтті.

Қаланың болашағы туралы көзқарасты бейнелейтін картиналар «Бәйтерек» монументі айналасында орналасқан. Елордалық жас белсенділер картиналар жасанды интеллект ChatGPT арқылы жасалғанын айтты. Олар жасанды интел-лектің астана-лықтар тарапынан ұқыптылық болмаса, қаланың және оның танымал орындарының жағдайы не болатынын көрсетуді сұрады.

«Экоакция барлық қалалар мен ауылдардың тұрғындарына белсенділік танытуға мүмкіндік жасайды. Артқа қарап, қоқысты ғана емес, оны тазарту арқылы біз өнертін күнге қамқорлық жасайтынымызды байқаймыз. Ұқыптылық бізден басталады. Табиғат аясында демалғаннан кейін өзіңізбен алып келген заттардан қалған қоқыстарды бірге алып кету керек. Табиғатымызды, сүіікті Қазақстанымызды қорғауымыз керек», — деп атап өтті акция қонағы, Қосшы қаласы мәслихатының депутаты Ирина Осипова. Сондай-ақ қала тұрғындары үшін қоршаған ортаны тазарту үнемі алаңдаушылық туғызатынын атап өтті.

## JAS GALA ФЕСТИВАЛІНІҢ ЖЕҢІМПАЗДАРЫ АНЫҚТАЛДЫ

Алматы қаласы Жастар саясаты басқармасының қолдауымен қала жастары арасында Jas Gala жастар фестивалі өтті. Фестиваль жеңімпаздарын марапаттау рәсімі «Алатау» театрында ұйымдастырылды.

Бір айға созылған фестивальда қатысушылар вокал, хореография, мобилография, аспаптық орындау, театр бағыттары бойынша бақ сынаған. Жалпы жобаға 2,5 мыңнан астам студент қатысты.

— Jas Gala фестивалі Алматы қаласында үшінші рет ұйымдастырылып отыр. Оған қаладағы барлық Жоғары оқу орындары мен колледждердің студенттері қатысты. Нақты айтқанда, 30 ЖОО және 23 колледжден 529 өтінім келіп түсті. Фестивальдың жүлде қоры 7 500 000 теңгені құрады. Фестивальға қатысу үшін алдымен университет және колледж ішінде іріктеу болды. Оның жеңімпаздары қалалық жарысқа қатысты, — деді Алматы студенттер альянсының басшысы Жасұлан Қуандық.



Меншік иесі — «Айқын-Литер» ЖШС

Директор —  
Талағат ЕШЕНҰЛЫ

Бас редактор —  
Амангелді ҚҰРМЕТ

Гүлзина БЕКТАС —  
Бас редактордың  
бірінші орынбасары

Ботагөз МАРАТҚЫЗЫ —  
Шығарушы редактор

Елдар ҚАБА —  
Секретариат меңгерушісі

**АЙМАҚТАҒЫ ТІЛШАЕР:**  
Абзал АЛПЫСБАЙҰЛЫ —  
Ақмола облысы  
Алтынай БАУЫРЖАНҚЫЗЫ —  
Алматы қаласы  
Саятхан САТЫБАЛАН —  
Жамбыл облысы  
Әбдімет БЕЛПІБАЙҰЛЫ —  
Қарағанды облысы  
Назгүл НАЗАРБЕК —  
Шымкент қаласы  
Жаннат ҚАЙЫРҒОЖИНА —  
Батыс Қазақстан облысы  
Ербақыт ЖАҒАСБАЙ —  
Қызылорда облысы  
Бағи ЖАНУЗАҚ —  
Атырау облысы

**«АЙҚЫН» ГАЗЕТІНІҢ  
ЖАЗЫЛУ ИНДЕКСІ:**

Көшіпорындар,  
мекемелер үшін — 15102  
Зейнеткерлер,  
соғыс ардагерлері үшін — 55102  
Жеке жазылушылар үшін — 65102

**ЖАРНАМА БОЛІМЕ:**  
8(701) 675-42-14, 8(7172) 72-95-31  
reklama.aiqyn@gmail.com  
**ЖАЗЫЛУ ЖӘНЕ ТАРАТУ БОЛІМЕ:**  
8(7171) 884-61-32  
podpiska.ai@gmail.com

Газет аптасына 3 рет шығады

Газет «Айқынның»  
компьютер орталығында беттелді

**ТАРАЛЫМЫ: 40 000**

Тапсырыс №4447  
Астана қ., «Медиа-холдинг «ERNUR» ЖШС  
Слветі көшесі 30,  
тел.: 8(7172) 99-77-77  
Алматы қаласы, «Алматы-Болашақ» АҚ  
Мұқанов көшесі, 223 В  
Шымкент қ., «ERNUR-print» ЖШС,  
Әлімқұлов көшесі 22,  
тел.: 8(7252) 53-06-66, 54-07-47 ішкі 114,